



LIGJ
Nr. 121/2014

PËR AZILIN NË REPUBLIKËN E SHQIPËRISË¹

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

KREU I
DISPOZITA TË PËRGJITHSHME

Neni 1
Qëllimi i ligjit

Ky ligj ka për qëllim parashikimin e kushteve e të procedurave për dhënien dhe heqjen e azilit,

¹ Ky ligj është përafshuar pjesërisht me:

Direktivën e Këshillit 2001/55/KE, datë 20 korrik 2001, “Standardet minimale për dhënien e mbrojtjes së përkohshme në rastet e flukseve masive të personave të shpërngulur dhe mbi masat që promovojnë një ekuilibër përpjekjesh ndërmjet shteteve anëtare në pritjen e këtyre personave dhe përballimin e pasojave”, numri CELEX 32001L005, Fletorja Zyrtare e Bashkimit Europian, seria L, nr. 212, datë 7.8.2001, faqe 12–23.

Direktivën e Këshillit 2003/9/KE, datë 27 janar 2003 “Për përcaktimin e standardeve minimale për pritjen e azilkërkuesve”, numri CELEX 32003L0009, Fletorja Zyrtare e Bashkimit Europian, seria L, nr. 31, datë 6.2.2003, faqe 18–25.

Direktivën e Këshillit 2003/86/EC, datë 22 shtator 2003, “Mbi të drejtën e bashkimit familjar”, numri CELEX 32003L0086, Fletorja Zyrtare e Bashkimit Europian, seria L, nr. 251, datë 3.10.2003, faqe 12–18.

Direktivën e Këshillit 2005/85/KE, datë 1 dhjetor 2005, “Për përcaktimin e standardeve minimale të procedurave në shtetet anëtare për dhënien dhe heqjen e statusit të refugjatit”, numri CELEX 32005L0085, Fletorja Zyrtare e Bashkimit Europian, seria L nr. 326, datë 13.12.2005, faqe 13-34.

Direktivën e Parlamentit Europian dhe të Këshillit 2011/95/BE, datë 13 dhjetor 2011 “Standardet për cilësimin e shtetasve të vendeve të treta ose personave pa shtetësi si përfitues të mbrojtjes ndërkombëtare, për një status uniform për refugjatët dhe për personat e pranueshëm për mbrojtje plotësuese dhe përmbajtja e mbrojtjes së dhënë”, numri CELEX 32011L0095, Fletorja Zyrtare e Bashkimit Europian, seria L nr. 337, datë 20.12.2011, faqe 9–26.

mbrojtjen plotësuese dhe mbrojtjen e përkohshme në Republikën e Shqipërisë, të drejtat dhe detyrimet e azilkërkuesve, refugjatëve e të personave nën mbrojtje të përkohshme dhe plotësuese, përmbajtjen e statusit të refugjatit dhe mbrojtjes plotësuese, të drejtën për bashkim familjar, si dhe përcaktimin e kushteve për integrimin e refugjatëve e të personave nën mbrojtje plotësuese në Republikën e Shqipërisë.

Neni 2
Objekti i ligjit

Objekti i këtij ligji është përcaktimi:

a) i parimeve dhe kushteve themelore për njohjen dhe garantimin e së drejtës së personave të huaj apo pa shtetësi për të kërkuar mbrojtje ndërkombëtare;

b) i autoriteteve përgjegjëse dhe i kompetencave të tyre në trajtimin e të huajve dhe personave pa shtetësi që kërkojnë mbrojtje ndërkombëtare;

c) i mënyrave të regjistrimit dhe i dokumenteve, me të cilat pajisen personat që kanë kërkuar azil dhe ata që kanë përfutur një nga format e mbrojtjes ndërkombëtare në Republikën e Shqipërisë;

ç) i statusit të refugjatit dhe statusit të mbrojtjes plotësuese;

d) i të drejtave që burojnë nga mbrojtja ndërkombëtare;

dh) i së drejtës së ankimit administrativ dhe gjyqësor.

Neni 3
Përkufizime

Në këtë ligj termat e mëposhtëm kanë këto kuptime:

a) “Azil” është forma e mbrojtjes ndërkombëtare që Republika e Shqipërisë u jep refugjatëve.

b) “Kërkesë për azil” është çdo deklaratë e të huajit ose personit pa shtetësi, e shprehur në çfarëdo mënyre e në çfarëdo kohe përpara autoriteteve kompetente në pikat e kalimit kufitar apo brenda territorit të Republikës së Shqipërisë, i cili kërkon mbrojtje ndërkombëtare, sipas konventave ndërkombëtare dhe legjislacionit shqiptar.

c) “Aplikim për azil” është kërkesa zyrtare e të huajit ose personit pa shtetësi para autoritetit përgjegjës për azilin dhe refugjatët, e cila vlerësohet



si një kërkesë për mbrojtje ndërkombëtare, sipas Konventës së Gjenevës së OKB-së, “Mbi statusin e refugjatit”. Çdo kërkesë për mbrojtje ndërkombëtare vlerësohet si aplikim për azil, përveç rastit kur i huaji kërkon qartazi një lloj tjetër mbrojtjeje, për të cilën aplikohet veçmas.

ç) “Azilkërkues” është çdo i huaj apo person pa shtetësi, që shpreh në çfarëdolloj mënyre se nuk dëshiron të kthehet në vendin e tij, si dhe çdo i huaj apo person pa shtetësi që ka paraqitur një aplikim për azil në Republikën e Shqipërisë, për të cilin nuk është marrë ende një vendim përfundimtar.

d) “Refugjat” është i huaji apo personi pa shtetësi, i cili, për shkak të frikës së bazuar të persekutimit, për arsye të racës, besimit, kombësisë, anëtarësisë në një grup të caktuar shoqëror ose bindjes politike, ndodhet jashtë vendit të shtetësisë së tij ose vendit të zakonshëm të banimit dhe nuk ka mundësi ose dëshirë për të kërkuar mbrojtjen e atij vendi apo kthimin në atë vend, si pasojë e këtyre rrethanave, në përputhje me kriteret e nenit 1(A) të Konventës së Gjenevës.

dh) “Status i refugjatit” është njohja nga autoriteti përgjegjës për azilin dhe refugjatët në Republikën e Shqipërisë i shtetasit të huaj ose personit pa shtetësi si refugjat.

e) “I mitur i pashoqëruar” është i huaji apo personi pa shtetësi nën 18 vjeç, i cili hyn në territorin e Republikës së Shqipërisë i pashoqëruar nga një person madhor, përgjegjës për të, sipas ligjit ose sipas traditës, ose është lënë i pashoqëruar pasi ka hyrë në territorin e Republikës së Shqipërisë dhe për sa kohë ai nuk është efektivisht nën kujdesin e një personi të tillë.

ë) “Mbrojtje e përkohshme” është një procedurë e veçantë mbrojtjeje, e cila u siguron mbrojtje të menjëhershme dhe të përkohshme personave të shpërngulur në rastet e flukseve masive, të cilët nuk mund të kthehen në vendin e tyre të origjinës, në veçanti, nëse ekziston rreziku që sistemi i azilit të jetë i paafte të procedojë me këtë fluks, pa krijuar efekte të pafavorshme në funksionimin e tij efektiv, në interes të këtyre personave.

f) “Fluks masiv” është hyrja në territorin e Republikës së Shqipërisë e një mase të madhe të personave të shpërngulur, të cilët vijnë nga një shtet apo zonë gjeografike e caktuar, qoftë edhe nëse ardhja e tyre ka qenë spontane apo e ndihmuar nga një program evakuimi.

g) “Heqje e statusit të refugjatit” është vendimi i marrë nga autoriteti përgjegjës për revokimin e statusit të refugjatit.

gj) “Person i pranueshëm për mbrojtje plotësuese” është i huaji ose personi pa shtetësi, i cili nuk konsiderohet si refugjat, por për të cilin janë shfaqur arsye thelbësore për të besuar se, nëse ai kthehet në vendin e tij të origjinës apo, në rastin e personit pa shtetësi, në vendin e tij të banimit të mëparshëm të zakonshëm, do të përballlet me rrezik real të cenimit serioz dhe është në pamundësi apo, për shkak të rrezikut të tillë, nuk dëshiron të shfrytëzojë mbrojtjen e atij vendi.

h) “Status i mbrojtjes plotësuese” është njohja nga autoriteti përgjegjës për azilin dhe refugjatët në Republikën e Shqipërisë i të huajit ose personit pa shtetësi, si person i pranueshëm për mbrojtje plotësuese.

i) “Bashkim familjar” është hyrja dhe qëndrimi në Republikën e Shqipërisë i anëtarëve të familjes së një refugjati, të cilët nuk janë shtetas shqiptarë, me synim ruajtjen e unitetit të familjes, pavarësisht nëse marrëdhënia krijohet para apo pas hyrjes së refugjatit në Republikën e Shqipërisë.

j) “Anëtarët e familjes” janë të afërmit e azilkërkuesit, refugjatit apo personit nën mbrojtje plotësuese, sipas përkufizimit të përcaktuar në ligjin për të huajt.

k) “I huaj” është personi, sipas kuptimit të dhënë në ligjin për të huajt.

l) “Kujdestar” është personi, të cilit i njihet kjo cilësi sipas Kodit të Familjes të Republikës së Shqipërisë ose që është caktuar tashmë, si i tillë, sipas ligjit apo traditës së vendit nga vjen i huaji që kërkon azil.

ll) “Qendër pritëse për azilkërkuesit” është çdo vend i caktuar për strehim kolektiv të azilkërkuesve.

m) “Moskthim” është detyrimi i ndalimit për të dëbuar apo kthyer të huajin ose personin pa shtetësi në çfarëdolloj mënyre në kufijtë e territoreve ku i kërcënohet jeta ose liria e tij, për arsye të racës, besimit, kombësisë, anëtarësisë në një grup të caktuar shoqëror ose bindjeve politike të tij.

n) “Shtet apo vend i origjinës” është shteti, shtetësinë e të cilit mban azilkërkuesi apo refugjati dhe, në rastin e personave pa shtetësi, shteti në të cilin refugjati apo azilkërkuesi ka vendbanimin e tij të zakonshëm.



n) “UNHCR” është Zyra e Komisionerit të Lartë për Refugjatët e Organizatës së Kombeve të Bashkuara.

o) “Konventa e Gjenevës” është Konventa për Statusin e Refugjatit, e datës 28 korrik 1951, e ndryshuar me protokollin e Nju Jorkut, të datës 31 janar 1967, të ratifikuar.

p) “Ministri përgjegjës” është ministri që mbulon strukturën përgjegjëse për azilin dhe refugjatët.

Neni 4

E drejta për azil

Në Republikën e Shqipërisë garantohet e drejta për azil e të huajit apo personit pa shtetësi, i cili, për shkak të frikës së bazuar të persekutimit, për arsye të racës, besimit fetar, kombësisë, anëtarësisë në një grup të caktuar shoqëror ose bindjes politike, ndodhet jashtë vendit të shtetësisë së vet ose jashtë vendbanimit të zakonshëm të mëparshëm dhe nuk ka mundësi ose dëshirë të kërkojë mbrojtjen e atij vendi, si pasojë e këtyre ngjarjeve, për arsye të kësaj frike.

Neni 5

Përjashtimi nga e drejta për azil

1. E drejta për azil nuk i garantohet të huajit kur ka të dhëna për:

a) kryerjen e një krimi kundër paqes, krimi luftime apo kundër njerëzimit, kryerjen e një akti terrorist, sipas përcaktimeve të parashikuara në konventat ndërkombëtare;

b) kërcënimin e rendit publik dhe sigurisë kombëtare të Republikës së Shqipërisë, për shkak të kryerjes së një krimi të rëndë jopolitik jashtë territorit të Republikës së Shqipërisë, para hyrjes si azilkërkues në territorin e Republikës së Shqipërisë;

c) fajësinë për veprime që bien ndesh me qëllimet dhe parimet e Kombeve të Bashkuara.

2. E drejta për azil nuk i jepet një të huaji të marrë nën mbrojtje apo asistencë nga organet e OKB-së, me përjashtim të rasteve kur mbrojtja i garantohet nga Zyra e Komisionerit të Lartë për Refugjatët e Kombeve të Bashkuara (UNHCR).

3. Nëse mbrojtja ose asistencë, referuar pikës 2, të këtij neni, ka pushuar për ndonjë arsye, i huaji përfiton azil nëse plotëson kushtet e përcaktuara në këtë ligj.

4. Azili nuk i jepet një të huaji që ka të drejta dhe detyrime të barabarta me shtetasit e Republikës së Shqipërisë, me përjashtim të rasteve kur të drejtat dhe detyrimet lidhen specifikisht me shtetësinë shqiptare.

Neni 6

Parimi i moskthimit

1. Republika e Shqipërisë njeh dhe respekton detyrimin e autoriteteve për të mos kthyer a prapësuar, ekstraduar apo larguar jashtë territorit të saj personat që kanë përfituar apo kërkuar të drejtën e azilit apo të formave të tjera të mbrojtjes për këto raste:

a) në një shtet ku jeta apo liria e tyre kërcënohen për shkak të racës, besimit, kombësisë, anëtarësisë në një grup të caktuar shoqëror apo të bindjeve politike;

b) në një shtet ku ka arsye të besueshme se azilkërkuesi mund të jetë në rrezik t'i nënshtrohet torturës ose ndëshkimit çnjerëzor e degradues apo çdo trajtimi tjetër të parashikuar në Konventën Europiane për Mbrojtjen e të Drejtave dhe Lirive Themelore të Njeriut, të interpretuar nga Gjykata Europiane apo në traktatet/konventat ndërkombëtare ku Republika e Shqipërisë është palë;

c) në një shtet ku ka arsye të besueshme se azilkërkuesi mund të jetë në rrezik t'i nënshtrohet zhdukjes me forcë;

ç) në shtetin e tyre të origjinës, në rast se të huajve u është dhënë një nga format e mbrojtjes, në përputhje me dispozitat e këtij ligji;

d) në një shtet të tretë, i cili mund ta kthejë ose ta dërgojë personin në një nga shtetet, sipas përcaktimeve të shkronjave “a”, “b” dhe “c”, të këtij neni.

2. I huaji, të cilit aplikimi për azil i është refuzuar nga autoriteti përgjegjës për azilin dhe refugjatët, nuk dëbohet apo nuk nxirret jashtë territorit të Republikës së Shqipërisë përpara ushtrimin apo dhënies së mundësive ligjore për ushtrimin e të drejtave procedurale dhe garancive të parashikuara në këtë ligj, me përjashtim të rasteve kur në këtë ligj parashikohet ndryshe.

3. Për rastet përjashtimore, azilkërkuesi mund të kthehet kur:

a) ka arsye të bazuara e të arsyetuara në vendim për ta konsideruar si një rrezik për sigurinë kombëtare të Republikës së Shqipërisë;



b) është dënuar me vendim të formës së prerë për një krim që dënohet minimalisht me 7 vjet burgim, i cili përbën një rrezik për rendin dhe sigurinë e Republikës së Shqipërisë.

Neni 7

Autoritetet përgjegjëse

1. Autoriteti përgjegjës për azilin dhe refugjatët është struktura përgjegjëse në ministrinë përkatëse për çështjet e azilit dhe refugjatët.

2. Autoriteti kompetent në kufi për trajtimin e personave që kërkojnë mbrojtje ndërkombëtare është struktura përgjegjëse për kufirin dhe migracionin.

3. Komisioneri Kombëtar për Azilin dhe Refugjatët është drejtuesi i Komisionit Kombëtar për Azilin dhe Refugjatët.

4. Komisioni Kombëtar për Azilin dhe Refugjatët është autoriteti i vetëm kompetent vendimmarrës për ankimet kundër vendimeve të autoritetit përgjegjës për azilin dhe refugjatët.

5. Autoriteti përgjegjës për pajisjen me leje pune dhe trajtimin e marrëdhënieve të punës së refugjatëve e të personave në mbrojtje është struktura përgjegjëse në ministrinë përgjegjëse për çështjet e punës.

Neni 8

Kushtet për kërkesën dhe aplikimin për azil

1. I huaji që kërkon azil në Republikën e Shqipërisë duhet:

a) të paraqesë kërkesën pranë autoriteteve policore kompetente në pikat e kalimit kufitar apo brenda territorit të Republikës së Shqipërisë dhe të paraqesë kërkesën për azil;

b) të plotësojë aplikimin për azil pranë autoritetit përgjegjës për azilin dhe refugjatët dhe të plotësojë aplikimin për azil.

2. Në rastet kur kërkohet azil, në përputhje me shkronjën “a”, të pikës 1, të këtij neni, autoritetet kompetente në kufi duhet të bëjnë njoftimin e rastit dhe dërgimin e menjëhershëm të tij pranë autoritetit përgjegjës për azilin dhe refugjatët, në mënyrë që të regjistrohet dhe të plotësojë aplikimin për azil, në përputhje me formularët e miratuar me urdhër të ministrit përgjegjës.

3. Procedura dhe rregullat e dërgimit të rastit nga autoriteti kompetent kufitar tek autoriteti përgjegjës për azilin dhe refugjatët përcaktohen me urdhër të ministrit përgjegjës.

Neni 9

Vend i tretë i sigurt

Zbatimi i konceptit të vendit të tretë të sigurt realizohet vetëm kur autoritetet kompetente kanë krijuar bindjen e arsyeshme se personi që kërkon azil do të trajtohet në vendin e tretë në përputhje me parimet e mëposhtme:

a) moskërcënimi i jetës dhe lirisë për shkak të racës, fesë, kombësisë, anëtarësisë në një grup të veçantë social ose mendimit politik;

b) respektimi i parimit të moskthimit, në përputhje me Konventën e Gjenevës dhe të drejtën ndërkombëtare;

c) ndalimi i dëbimit, nëse shkelet e drejta për liri nga tortura e trajtimi çnjerëzor ose poshtërues dhe e drejta për të mos qenë subjekt i zhdukjes me forcë, siç përcaktohet nga e drejta ndërkombëtare;

ç) ekziston mundësia për të kërkuar statusin e refugjatit dhe, nëse është refugjat, duhet të marrë mbrojtje në përputhje me Konventën e Gjenevës.

Neni 10

Refuzimi i azilit, për shkak të ardhjes nga një vend i tretë i sigurt

1. Azili i refuzohet të huajt që vjen nga një vend i tretë i sigurt, palë e Konventës së Gjenevës apo protokollit të saj të vitit 1967, kur nga ky vend azilkërkuesi nuk mund të parashtrijë frikë të bazuar persekutimi për të paktën njëri prej arsyeve të parashikuara në Konventën e Gjenevës, si edhe as ndonjë shkelje të të drejtave të njeriut apo rrezikut të dëbimit, në kuptimin e dispozitave të këtij ligji, apo edhe kur ai mund të kthehet ligjërisht në këtë vend, ku aplikimi i tij për status refugjati do të shqyrtohet në përputhje me standardet ndërkombëtare.

2. Lista e vendeve të treta të sigurta miratohet dhe përditësohet për këtë qëllim me vendim të Këshillit të Ministrave, duke u konsultuar edhe me listën e hartuar nga Bashkimi Europian ose, në mungesë të saj, me njëri prej shteteve anëtare të Bashkimit Europian.

Neni 11

Ndalimi i azilkërkuesve

1. Azilkërkuesit, që hyjnë në mënyrë të paligjshme në territorin e Republikës së Shqipërisë, nuk mund të ndiqen penalisht për kalim të paligjshëm të kufirit, me kusht që ata të paraqiten



përpara autoriteteve përkatëse brenda 10 ditëve nga dita e hyrjes në territorin e Republikës së Shqipërisë.

2. Azilkërkuesit, të cilët paraqiten brenda afatit, mund të ndalohen vetëm për arsyet e mëposhtme:

- a) për verifikimin e identitetit të tyre;
- b) kur nuk kanë dokumente identifikimi;
- c) kur janë kapur me dokumente të falsifikuara, me përjashtim të rastit kur ata i kanë përdorur këto dokumente për t'u larguar nga vendi për shkak të frikës dhe e kanë deklaruar këtë fakt vetë në kufi ose kur aplikojnë për azil;

ç) ndaj tyre është lëshuar një mandat arresti ndërkombëtar;

d) për mbrojtjen e sigurisë kombëtare dhe të rendit publik.

3. Masat shtrënguese ndaj një azilkërkuesi merren në përputhje me rregullat dhe procedurat e përcaktuara në ligjin penal dhe procedural në fuqi. Në çdo rast azilkërkuesit i garantohet e drejta e kontaktit me UNHCR-në.

4. Në rast ndalimi apo arrestimi, azilkërkuesi mbahet në ambiente të veçuara nga personat e tjerë, përveç kur këto masa shtrënguese merren në bazë të shkronjës “c”, të pikës 2, të këtij neni.

5. Në përputhje me normat e së drejtës ndërkombëtare mbi të drejtat e fëmijëve, në rastin e azilkërkuesve të mitur të pashoqëruar, nën moshën 18 vjeç, ata nuk mund të vendosen në institucione të ekzekutimit të vendimeve penale, përveçse në raste ekstreme. Në çdo rast tjetër ndaj tyre merren masat e duhura dhe të përshtatshme për fëmijët.

Neni 12

Paraqitja e aplikimit për azil

1. Azilkërkuesi duhet të plotësojë aplikimin për azil sa më shpejt të jetë e mundur.

2. Azilkërkuesi informohet jo më vonë se pesëmbëdhjetë ditë nga data e paraqitjes së aplikimit për azil, në lidhje me procedurën për dhënien e azilit, mbi të drejtat dhe detyrimet që ai ka gjatë procedurës, mbi mundësinë për të kontaktuar dhe për të pasur asistencë ligjore nga përfaqësuesit e UNHCR-së dhe përfaqësuesit e organizatave të tjera për mbrojtjen e të drejtave të refugjatëve, si dhe kujdesin shëndetësor.

Neni 13

Bashkëpunimi me Zyrën e UNHCR-së

1. Ministria përgjegjëse për çështjet e azilit dhe refugjatët dhe autoriteti përgjegjës për azilin dhe refugjatët bashkëpunon me Zyrën e UNHCR-së për çështjet e azilit dhe të refugjatëve.

2. Shkëmbimi i informacionit si dhe mënyrat e bashkëpunimit ndërmjet autoritetit përgjegjës për azilin e refugjatët dhe UNHCR-së, përcaktohen në marrëveshjen e bashkëpunimit ndërmjet ministrit përgjegjës për azilin dhe refugjatët dhe UNHCR-së.

Neni 14

E drejta e qëndrimit të azilkërkuesit gjatë aplikimit

1. Azilkërkuesi ka të drejtë të qëndrojë në territorin e Republikës së Shqipërisë deri në përfundimin e procedurës së filluar prej tij.

2. Anëtarët e familjes së azilkërkuesit, të cilët kanë ardhur në Republikën e Shqipërisë së bashku me azilkërkuesin, kanë të drejtë të qëndrojnë në përputhje me pikën 1 të këtij neni.

Neni 15

E drejta për përkthyes

1. Nëse azilkërkuesi nuk kupton gjuhën, në të cilën zhvillohet procedura, atij i sigurohet një përkthyes në gjuhën që ai kupton. Autoriteti përgjegjës për azilin dhe refugjatët ka detyrimin të vendosë në dispozicion të azilkërkuesit kopje të këtij ligji dhe të gjitha akteve nënligjore në zbatim të tij, si dhe kopje të dokumenteve, si leje qëndrimi, në një gjuhë zyrtare të OKB-së, e cila mund të jetë e kuptueshme për ata.

2. Të drejtën për përkthyes, sipas pikës 1, të këtij neni, e gëzojnë edhe të huajt në mbrojtje të përkohshme dhe mbrojtje plotësuese.

Neni 16

I mituri i pashoqëruar

1. Për azilkërkuesin e mitur të pashoqëruar duhet të emërohet një kujdestar, sipas rregullave dhe procedurës së parashikuar nga legjislacioni në fuqi. Procedura për caktimin e kujdestarit ndiqet me përparësi dhe asistohet nga autoriteti përgjegjës për azilin dhe refugjatët. Një e drejtë e tillë i njihet edhe të miturit të pashoqëruar në mbrojtje të përkohshme ose plotësuese.



2. Aplikimi për azil i një të mituri të pashoqëruar duhet të trajtohet menjëherë. Për aq sa mundet, fëmijët e në familjeje, duhet të mbahen bashkë.

3. Autoriteti përgjegjës për azilin dhe refugjatët duhet të kryejë procedurën e aplikimit për azil, duke marrë parasysh shkallën e pjekurisë fizike e mendore të të miturit dhe, kur është e nevojshme, i mituri të dëgjohet në prani të një psikologu.

Neni 17

Interesi më i lartë i fëmijës

Në zbatimin e këtij ligji, interesi më i lartë i fëmijës duhet të jetë konsiderata mbizotëruese, në përputhje me Konventën e OKB-së, “Mbi të drejtat e fëmijës”.

Neni 18

Detyrimet e përgjithshme të azilkërkuesve dhe refugjatëve

1. Azilkërkuesi dhe refugjati kanë detyrimin të zbatojnë Kushtetutën, rendin juridik dhe kuadrin ligjor të Republikës së Shqipërisë.

2. Azilkërkuesi dhe refugjati janë të detyruar të bashkëpunojnë me organet shtetërore kompetente të Republikës së Shqipërisë dhe të veprojnë në përputhje me masat dhe udhëzimet e tyre.

Neni 19

Kufizimet e primtarisë politike

Azilkërkuesit dhe refugjatët nuk mund të krijojnë, të bashkohen apo të mbështetën e të veprojnë në grupime politike apo organizata të tjera, që cenojnë rendin dhe sigurinë e Republikës së Shqipërisë.

Neni 20

Mbledhja e të dhënave

1. Autoriteti përgjegjës për azilin dhe refugjatët, për qëllime të këtij ligji, mbledh dhe përpunon të dhënat personale të azilkërkuesve/refugjatëve, në përputhje me legjislacionin në fuqi për mbrojtjen e të dhënave personale.

2. Autoriteti përgjegjës për azilin dhe refugjatët bashkëpunon me autoritetet përgjegjëse të policisë dhe të Shërbimit Informativ të Shtetit për mbledhjen dhe verifikimin e të dhënave.

3. Rregullat dhe procedurat për marrjen e informacionit dhe verifikimin e të dhënave e të

deklarimeve nga vendi i origjinës për azilkërkuesin dhe refugjatin miratohen me udhëzim të ministrit përgjegjës.

KREU II

KOMPETENCAT E AUTORITETEVE PËRGJEGJËSE PËR TRAJTIMIN E AZILKËRKUESVE/REFUGJATËVE DHE PERSONAVE NË MBROJTJE

Neni 21

Kompetencat e autoritetit përgjegjës për azilin dhe refugjatët

1. Autoriteti i vetëm për dhënien, heqjen dhe përjashtimin nga e drejta për azil dhe mbrojtje ndërkombëtare është struktura pranë ministrisë përgjegjëse për azilin dhe refugjatët. Ajo është përgjegjëse për trajtimin e aplikimeve, procedimin, shqyrtimin e dëgjimeve dhe grumbullimin e të dhënave të tjera të nevojshme për plotësimin e dokumentacionit për çdo aplikim për azil.

2. Autoriteti përgjegjës për azilin dhe refugjatët bashkëpunon me Shërbimin Informativ të Shtetit për çështjet e azilit.

Neni 22

Komisioni Kombëtar për Azilin dhe Refugjatët

1. Komisioni Kombëtar për Azilin dhe Refugjatët është autoriteti i vetëm kompetent vendimmarrës për ankimet e bëra kundër vendimeve të autoritetit përgjegjës për azilin dhe refugjatët.

2. Krijimi, përbërja, organizimi dhe funksionimi i Komisionit Kombëtar për Azilin dhe Refugjatët përcaktohen me vendim të Këshillit të Ministrave.

Neni 23

E drejta e komunikimit me UNHCR-në

1. Azilkërkuesit, refugjatët dhe personat në mbrojtje kanë të drejtë të kontaktojnë me Zyrën e Komisionerit të Lartë për Refugjatët të Kombeve të Bashkuara (UNHCR). Përfaqësuesit e UNHCR-së kanë të drejtë të takohen me çdo azilkërkues, refugjat apo person në mbrojtje, që ndodhet në territorin e Republikës së Shqipërisë.



2. Autoriteti përgjegjës për azilin dhe refugjatët, me kërkesë të UNHCR-së, dërgon pranë saj informacionin e nevojshëm për azilkërkuesit e regjistruar dhe, në mënyrë të veçantë, i mundëson UNHCR-së, në bazë të kërkesës, shqyrtimin e dosjeve individuale të azilkërkuesve dhe refugjatëve. Autoriteti përgjegjës për azilin dhe refugjatët i dërgon UNHCR-së listën e aplikimeve që shqyrtohen nga ky autoritet e të ankimeve që janë paraqitur, si dhe çdo informacion tjetër që kërkohet për të siguruar bashkëpunimin ndërmjet autoriteteve vendase me UNHCR-në, në përputhje me nenin 35 të Konventës së Gjenevës.

3. Autoriteti përgjegjës për azilin dhe refugjatët mund t'i kërkojë UNHCR-së mendime apo rekomandime me karakter të përgjithshëm, si dhe rekomandime për raste të veçanta apo gjatë flukseve masive.

4. Autoriteti përgjegjës për azilin dhe refugjatët i njeh UNHCR-së, kur ajo e kërkon, të drejtën për të marrë pjesë me statusin e vëzhguesit në mbledhjet që kanë të bëjnë me përcaktimin e statusit të refugjatit, mbrojtjes plotësuese apo mbrojtjes së përkohshme.

KREU III

DOKUMENTET DHE REGJISTRIMI I AZILKËRKUESVE DHE REFUGJATËVE

Neni 24

Detyrimi për pajisjen me dokumente

1. Azilkërkuesi pajiset me dokumentet e mëposhtme:

- vërtetimin e dorëzimit të aplikimit për azil;
- leje të përkohshme qëndrimi, të lëshuar nga autoritetet për të huajt, sipas procedurave të parashikuara nga ligji për të huajt, e cila shërben edhe si dokument identifikimi;
- leje pune.

2. Refugjati pajiset me dokumentet e mëposhtme:

- letërnjoftim elektronik për refugjatin;
- dokument udhëtimi për refugjatin;
- leje të përhershme qëndrimi.

3. Autoriteti përgjegjës për azilin dhe refugjatët i kërkon ministrisë përgjegjëse për punët e jashtme të pajisë me vizë refugjatin, pas paraqitjes së kërkesës së tij, sipas legjislacionit në fuqi.

Neni 25

Mbajtja e përkohshme e dokumenteve të huaja

1. Autoriteti përgjegjës për azilin dhe refugjatët mund të mbajë një dokument të huaj të udhëtitimit ose dokument identifikimi të azilkërkuesit dhe refugjatit nëse kjo kërkohet për arsye të mbrojtjes së sigurisë kombëtare dhe rendit publik.

2. Dokumentet e sipërpërmendura mund të bllokohen:

- deri në revokimin e statusit të refugjatit;
- për aq kohë sa ekzistojnë arsyet për mbajtjen e tyre.

3. Procedurat e bllokimit të dokumenteve për të huajin, sipas parashikimeve të legjislacionit në fuqi për të huajt, zbatohen për aq sa nuk bien ndesh me legjislacionin në fuqi në këtë fushë. Në rast bllokimi të dokumenteve, lëshohet një certifikatë e përkohshme derisa të zhbllokohet mbajtja e përkohshme e dokumenteve të huaja.

4. Personi i interesuar ka të drejtën e ankimit administrativ dhe atij gjyqësor në bazë të legjislacionit në fuqi.

Neni 26

Vërtetimi i dorëzimit të aplikimit për azil

1. Vërtetimi i dorëzimit të aplikimit për azil i azilkërkuesit shërben si dëshmi e fillimit të procedurave për azil dhe dhënies së lejes së qëndrimit në Republikën e Shqipërisë, deri në përfundimin e procedurës. Ky vërtetim lëshohet jo më vonë se 3 ditë nga data e dorëzimit të aplikimit.

2. Vërtetimi i dorëzimit të aplikimit për azil për azilkërkuesit duhet të lëshohet edhe për anëtarët e familjes së tij.

3. Format i vërtetimit të dorëzimit të aplikimit miratohet me urdhër të ministrit përgjegjës.

Neni 27

Dokumenti i udhëtitimit dhe letërnjoftimi elektronik për refugjatin

1. Refugjatit, me kërkesën e tij, i lëshohet letërnjoftim elektronik dhe dokument udhëtimi.

2. Për refugjatin e mitur, kërkesa për pajisje me dokument udhëtimi kryhet me kërkesë dhe në prezencë të të paktën njërit prej prindërve, të kujdestarit ose të përfaqësuesit me prokurë të posaçme.



3. Refugjati i mitur nën 16 vjeç pajiset vetëm me dokument udhëtimi, me vlefshmëri 5 vjet.

4. Refugjati mbi 16 vjeç pajiset me letërnjoftim elektronik dhe me dokument udhëtimi, me vlefshmëri 10 vjet, për secilin dokument.

5. Kriteret dhe procedura për pajisjen me letërnjoftim elektronik dhe dokument udhëtimi për këtë kategori personash përcaktohen me udhëzim të ministrit përgjegjës.

Neni 28

Kthimi i dokumenteve

1. Dokumentet e mbajtura sipas nenit 25 i kthehen personit pas përfundimit të procedurave të azilit ose pas marrjes së statusit të refugjatit.

2. Në rast humbjeje apo dëmtimi të dokumenteve të lëshuara, zbatohen dispozitat e ligjit për të huajt.

Neni 29

Regjistrimi

1. Autoriteti përgjegjës për azilin dhe refugjatët regjistron në një regjistër të posaçëm të dhënat personale dhe elementet e nevojshme të dokumenteve të përcaktuara në këtë ligj për azilkërkuesit dhe refugjatët dhe për ata që janë në mbrojtje. Kriteret, procedurat për mbajtjen e këtij regjistri dhe formati i tij miratohen me urdhër të ministrit përgjegjës.

2. Refugjatët dhe të huajt në mbrojtje plotësuere regjistrohen në Regjistrin Kombëtar të Gjendjes Civile, sipas procedurave të përcaktuara me udhëzim të ministrit që mbulon shërbimin e gjendjes civile.

3. Të dhënat personale të administruara në këta regjistra përpunohen në përputhje me parimet e mbrojtjes të të dhënave personale.

KREU IV

TË DREJTAT DHE DETYRIMET E AZILKËRKUESVE

Neni 30

Të drejtat e azilkërkuesve

1. Azilkërkuesi trajtohet në përputhje me të drejtën ndërkombëtare dhe legjislacionin shqiptar në fuqi.

2. Azilkërkuesit i garantohet:

a) e drejta e moskthimit, sipas nenit 6, të këtij ligji;

b) e drejta e strehimit, e ushqimit, e kujdesit shëndetësor dhe shërbimeve të tjera publike për nevoja ngushtësisht vetjake, të ofruara në qendrën kombëtare pritëse për azilkërkuesit.

3. Azilkërkuesit e mitur akomodohen së bashku me prindërit e tyre ose pjesëtarët madhorë të familjes, përgjegjës për ata.

Neni 31

Detymet e azilkërkuesve në Republikën e Shqipërisë

1. Azilkërkuesi në Republikën e Shqipërisë ndalohet të angazhohet në veprimtari që cenojnë rendin publik dhe sigurinë kombëtare dhe mund të ndikojnë në marrëdhëniet e Republikës së Shqipërisë me vendet e tjera.

2. Azilkërkuesi në Republikën e Shqipërisë nuk duhet të veprojë kundër parimeve dhe qëllimeve, që burojnë nga traktatet dhe konventat e OKB-së, të ratifikuara nga Republika e Shqipërisë dhe e drejta ndërkombëtare publike.

3. Azilkërkuesi duhet të japë çdo informacion, për të cilin mendohet se ai ka dijeni, kur i kërkohet nga autoriteti përgjegjës për azilin dhe refugjatët dhe që shërben për marrjen e një vendimi të bazuar e të drejtë për aplikimin e tij për azil.

4. Azilkërkuesi duhet të jetë në dispozicion të autoritetit përgjegjës për azilin dhe refugjatët gjatë gjithë procedurës së shqyrtimit të aplikimit për azil.

Neni 32

Qendra pritëse për azilkërkuesit

1. Azilkërkuesi, pas paraqitjes së kërkesës për azil, akomodohet në qendrën pritëse për azilkërkuesit. Në këtë qendër do të vazhdojë të akomodohet edhe personi, të cilit i është refuzuar aplikimi për azil, derisa të mbarojnë procedurat e ankimit apo afatet për ushtrimin e tyre.

2. Organizimi dhe funksionimi i qendrës pritëse rregullohen me vendim të Këshillit të Ministrave.

3. Qendra duhet të sigurojë kushtet minimale të jetesës, përfshirë:

a) akomodimin;

b) ushqimin;

c) sigurimin shëndetësor;

ç) kushtet minimale të higjienës.

4. Në bashkëpunim me subjekte të tjera, private apo shtetërore, vendase apo të huaja, në përputhje me të drejtat e azilkërkuesve e të refugjatëve,



zhvillohen programe pedagogjike e edukuese, si dhe këshillim ligjor falas.

5. Azilkërkuesi mund të përfitojë edhe ndihma humanitare.

6. Azilkërkuesit, të cilët disponojnë mjete financiare ose që e kanë të garantuar jetesën, nuk përfitojnë ndihma financiare.

Neni 33

Shërbimet e kujdesit shëndetësor

1. Azilkërkuesit përfitojnë shërbime të kujdesit shëndetësor, sipas legjislacionit shqiptar në fuqi për kujdesin shëndetësor.

2. Azilkërkuesit e mitur përfitojnë shërbim shëndetësor të plotë, si për shtetasit e mitur shqiptarë.

KREU V

PROCEDURA PËR SHQYRTIMIN E APLIKIMIT PËR AZIL

Neni 34

Aplikimi për azil dhe shqyrtimi

1. Aplikimi për azil plotësohet me shkrim. Nëse personi nuk kupton gjuhën, me të cilën zhvillohet procedura, atij i sigurohet përkthyes në gjuhën që ai kupton. Aplikimi, përveç identitetit, duhet të përmbajë dhe shkaqet, për të cilat azilkërkuesi kërkon mbrojtje në territorin e Republikës së Shqipërisë.

2. Azilkërkuesi është i detyruar të paraqesë të gjitha të dhënat personale dhe të plotësojë të gjithë formularët përkatës, të vënë në dispozicion nga autoriteti përgjegjës për azilin dhe refugjatët.

3. Në kohën e plotësimit të aplikimit për azil, autoriteti përgjegjës për azilin dhe refugjatët informon azilkërkuesin për procedurat e marrjes së statusit të refugjatit dhe i mundëson atij kontaktin me një përfaqësues ligjor, specialist në çështjet e refugjatëve, për shërbime ligjore falas.

4. Për periudhën deri në dhënien e vendimit përfundimtar për aplikimin për azil, azilkërkuesi lejohet të qëndrojë në territorin e Republikës së Shqipërisë.

5. Personi, që ka aplikuar për azil, nuk mund të kërkojë leje qëndrimi me motiv tjetër, në bazë të ligjit për të huajt.

6. Azilkërkuesi ka të drejtë të qëndrojë në qendrën pritëse gjatë kohëzgjatjes së procedurës për marrjen e statusit të refugjatit. Në qoftë se azilkërkuesi ka mundësi të qëndrojë jashtë qendrës

pritëse dhe përballon kushtet minimale të jetesës, autoriteti përgjegjës për azilin dhe refugjatët vendos largimin e azilkërkuesit brenda 30 ditëve.

Neni 35

Kushtet dhe procedura administrative e dëgjimit dhe shqyrtimit të aplikimit

1. Azilkërkuesi duhet të dëgjohet për aplikimin e tij për azil nga autoriteti përgjegjës për azilin dhe refugjatët, i cili duhet të marrë në konsideratë gjendjen dhe rrethanat, në të cilat aplikuesi ndodhet. Azilkërkuesi njoftohet me shkrim për caktimin e datës së dëgjimit, e cila nuk mund të jetë më vonë se 21 ditë nga data e paraqitjes së aplikimit të plotë pranë autoritetit përgjegjës për azilin dhe refugjatët.

2. Azilkërkuesi mund të pyetet dhe të ripyetet për faktet e ngjarjet e deklaruara gjatë dëgjimit, kur ka paqartësi për ato fakte apo për informacionet e mbledhura nga autoriteti përgjegjës për azilin dhe refugjatët, brenda një periudhe jo më vonë se 20 ditë nga data e seancës së dëgjimit. Për datën e ridëgjimit njoftohet me shkrim i interesuari.

3. Azilkërkuesi, në çdo fazë të procedurës, shoqërohet, këshillohet apo përfaqësohet nga një përfaqësues ligjor, specialist në çështjet e refugjatëve.

4. Azilkërkuesit e seksit femër, nëse është e mundur, dëgjohehen dhe pyeten nga punonjëse femra të personelit të autoritetit përgjegjës për azilin dhe refugjatët. I mituri azilkërkues, i pashoqëruar, dëgjohet dhe pyetet në prani edhe të një psikologu apo të një të rrituri, që njeh mirë natyrën e fëmijës apo që gëzon besimin e tij.

5. Azilkërkuesi duhet të shpjegojë faktet, ku mbështeten arsyet dhe motivet për persekutimin e tij apo për shkeljen e të drejtave të njeriut, dhe të japë të dhënat e nevojshme, ku përfshihen informacioni për vendbanimin e përhershëm, për itinerarin, ndalesat në vendet e tjera dhe kërkesat e mundshme për azil në vende të tjera, si dhe të dhëna të tjera të nevojshme për sqarimin e rrethanave të rastit.

6. Në seancën e dëgjimit mund të marrë pjesë edhe një përfaqësues i UNHCR-së.



Neni 36

Konfidencialiteti gjatë procedurës së dëgjimit

1. Seanca e dëgjimit të azilkërkuesit nuk është publike dhe atij i garantohet zhvillimi konfidencial i kësaj seance.

2. Punonjësit e autoritetit përgjegjës për azilin dhe refugjatët i nënshtrohen detyrimit të ruajtjes së konfidencialitetit dhe mospërhapjes së informacionit të marrë, për shkak të detyrës gjatë mbledhjes, ruajtjes dhe përpunimit të të dhënave personale për trajtimin e refugjatëve apo personave në mbrojtje, gjatë ushtrimit të detyrave të tyre edhe pas përfundimit të funksioneve, përveç kur parashikohet ndryshe me ligj.

3. Për përmbushjen e këtij detyrimi, personat pjesëmarrës në seancën e dëgjimit nënshkruajnë një deklaratë konfidencialiteti, sipas së cilës duhet të ruajnë konfidencialitetin në përputhje me legjislacionin në fuqi edhe pas përfundimit të detyrës së tyre.

Neni 37

Zhvillimi i procedurave nga autoriteti përgjegjës për azilin dhe refugjatët

1. Autoriteti përgjegjës për azilin dhe refugjatët fillon procedurat administrative dhe regjistrin të gjitha të dhënat e rëndësishme të ofruara nga azilkërkuesi. Pasi aplikimi për azil të jetë plotësuar me të gjitha të dhënat dhe formularët e nevojshëm, autoriteti përgjegjës për azilin dhe refugjatët i lëshon azilkërkuesit një vërtetim, me të cilin vërtetohen identiteti i tij dhe marrja e aplikimit për azil, duke e garantuar për moskthimin e tij, në përputhje me nenin 31 të këtij ligji.

2. Autoriteti përgjegjës për azilin dhe refugjatët drejton dëgjimin, verifikon faktet e dhëna, shqyrton dhe plotëson dokumentacionin e nevojshëm para marrjes së vendimit. Në dosje vendoset edhe rekomandimi i dhënë nga UNHCR-ja për aplikimin për azil.

3. Autoriteti përgjegjës për azilin dhe refugjatët merr vendim në bazë të deklarimeve përkatëse të aplikuesit, të marra sipas parashikimeve të këtij ligji. Në marrjen e vendimit përkatës, autoriteti përgjegjës për azilin dhe refugjatët mbështetet në parimin e besueshmërisë dhe në prezumimin që azilkërkuesi ka të drejtë, si dhe mban parasysht rekomandimet e paraqitura nga UNHCR-ja.

4. Autoriteti përgjegjës për azilin dhe refugjatët merr vendim brenda 30 ditëve nga data e dëgjimit të azilkërkuesit dhe u dërgon, pa vonesë, azilkërkuesit dhe UNHCR-së një kopje të vendimit, por, në çdo rast, jo më vonë se 5 ditë nga data e marrjes së vendimit. Vendimi i këtij autoriteti merret në një mbledhje të posaçme me shumicë votash e në mënyrë sa më konsensuale dhe procedura e marrjes së vendimit u nënshtrohet, për aq sa është e mundur, parimeve dhe legjislacionit në fuqi për marrjen e vendimeve nga organet kolegjiale. Ai duhet të përpilohet me shkrim dhe të jetë i arsyetuar. Punonjësit e autoritetit përgjegjës për azilin dhe refugjatët, të cilët janë në pakicë, mund ta shprehin me shkrim mendimin e tyre kundër, i cili duhet t'i bashkëlidhet vendimit përfundimtar.

5. Në rast se aplikimi për azil pranohet, autoriteti përgjegjës për azilin dhe refugjatët informon azilkërkuesin për kushtet e azilit dhe se statusi i refugjatit mund të revokohet vetëm në përputhje me nenin 45 të këtij ligji.

6. Në rast se aplikimi për azil nuk pranohet, autoriteti përgjegjës për azilin dhe refugjatët informon me shkrim azilkërkuesin për vendimin me karakter individual dhe të arsyetuar, ku parashikohen e drejta e subjektit për ankim, organi ku mund të paraqitet ky ankim dhe afati, brenda të cilit ai mund ta ushtrojë këtë të drejtë.

Neni 38

Kufizimi i lirisë së lëvizjes

1. Liria e lëvizjes së azilkërkuesit mund të kufizohet për:

- a) shkaqet e përmendura në pikën 2, të nenit 11, të këtij ligji;
- b) parandalimin e përhapjes së sëmundjeve infektive;
- c) shkeljen e ligjit dhe akteve të tjera nënligjore, si dhe masat e marra me qëllim ruajtjen e rendit publik.

2. Kufizimi i lirisë mund të bëhet në rastet e mëposhtme:

- a) ndalimi për të lëvizur jashtë qendrës pritëse për azilkërkuesit;
- b) ndalimi për të lëvizur jashtë zonës së caktuar; ose
- c) detyrimi për të lënë një adresë të caktuar.



3. Lëvizja kufizohet për një periudhë deri në 3 muaj dhe për rrethana të justifikuar mund të zgjatet deri në 1 muaj.

4. Përjashtimisht nga përcaktimi i pikës 3, të këtij neni, kufizimi i lirisë së lëvizjes, për arsyet e përmendura në pikën 1, të këtij neni, është i vlefshëm për atë kohë sa ekzistojnë arsyet për kufizim.

5. Kufizimi i lirisë së lëvizjes bëhet nga autoriteti përgjegjës për azilin dhe refugjatët me vendim të arsyetuar, formati i të cilit përcaktohet me urdhër të ministrit përgjegjës.

6. Kundër vendimit të kufizimit të lirisë së lëvizjes bëhet ankim brenda 15 ditëve pranë Komisionit Kombëtar për Azilin dhe Refugjatët. Ankimi nuk e pezullon ekzekutimin e vendimit.

Neni 39

Mospranimi i aplikimit për azil

1. Aplikimi për azil nuk pranohet nëse:

a) vërtetohet se azilkërkuesi vjen nga një vend i tretë i sigurt, në kuptim të nenit 9 të këtij ligji;

b) aplikimi për azil në Republikën e Shqipërisë është refuzuar ose nuk është pranuar apo procedura është pezulluar dhe nuk janë paraqitur prova që vërtetojnë rrethanat, mbi të cilat është bazuar aplikimi i mëparshëm apo prova të reja.

2. Kundër vendimit për mospranimin e aplikimit për azil, azilkërkuesi mund të bëjë ankim brenda 15 ditëve pranë Komisionit Kombëtar për Azilin dhe Refugjatët.

3. Komisioni Kombëtar për Azilin dhe Refugjatët merr vendim brenda 30 ditëve nga data e paraqitjes së ankesës.

Neni 40

Refuzimi i aplikimit për azil

1. Aplikimi për azil refuzohet nëse:

a) azilkërkuesi nuk i përmbush kushtet për njohjen e së drejtës së azilit, sipas nenit 4 të këtij ligji;

b) ekziston ndonjë nga arsyet e parashikuara në nenin 5 të këtij ligji;

c) aplikimi është i pabazuar në themel;

ç) azilkërkuesi ka edhe shtetësinë e një vendi të tretë, mbrojtjen e të cilit nuk e ka kërkuar.

2. Kundër vendimit për refuzimin e aplikimit për azil, si të pabazuar, azilkërkuesi mund të bëjë ankim, brenda 15 ditëve, pranë Komisionit

Kombëtar për Azilin dhe Refugjatët.

3. Komisioni Kombëtar për Azilin dhe Refugjatët vendos për ankesën e bërë në bazë të pikës 2, të këtij neni, brenda 30 ditëve nga data e paraqitjes së saj.

Neni 41

Pretendimet abuzive dhe të pabazuara

1. Autoriteti përgjegjës për azilin dhe refugjatët mund të vlerësojë një aplikim si “abuziv”, kur është vërtetuar, në mënyrë të pakundërshtueshme, se pretendimi i bërë nga azilkërkuesi nuk është i vërtetë dhe është bërë me qëllim për të mashtruar autoritetet.

2. Autoriteti përgjegjës për azilin dhe refugjatët mund të vlerësojë një aplikim si “dukshëm të pabazuar”, kur pretendimi i bërë nga azilkërkuesi nuk ka lidhje, në asnjë mënyrë, me kriteret për dhënien e azilit, të parashikuara sipas përcaktimeve të këtij ligji.

3. Në rastet kur autoriteti përgjegjës për azilin dhe refugjatët vlerëson se një aplikim për azil është “abuziv” apo “dukshëm i pabazuar”, ai merr vendim të ndërmjetëm, me shkrim dhe të arsyetuar, i cili përfshihet në dosjen e azilkërkuesit. Kundër këtij vendimi azilkërkuesi ka të drejtë të bëjë ankim, sipas procedurave të përcaktuara në këtë ligj. Në këto raste zbatohet procedura e përshpejtuar e shqyrtimit të aplikimit. Nëse në fazën e parë të procedurës së përshpejtuar, autoriteti përgjegjës për azilin dhe refugjatët nuk shprehet me vendim brenda 10 ditëve, aplikimi pranohet vetvetiu sipas procedurës normale të dhënies së statusit të refugjatit. Azilkërkuesi ka të drejtën e ankimit brenda 15 ditëve, duke filluar nga data kur ai merr dijeni për vendimin e autoritetit përgjegjës për azilin dhe refugjatët.

Neni 42

Mashtrimi gjatë procedurës së shqyrtimit të aplikimit për azil

Mashtrim gjatë procedurës konsiderohet kur azilkërkuesi vepron sipas rrethanave të mëposhtme:

a) bazon kërkesën e tij në identitet të rremë ose dokumente të falsifikuara, me përjashtim të rastit kur ata i kanë përdorur këto dokumente për t'u larguar nga vendi, për shkak të frikës dhe e kanë deklaruar këtë fakt;

b) bazon aplikimin e tij mbi arsye të rreme;



c) qëllimisht shkatërron pasaportën, biletën e udhëtimit ose dokument tjetër, i cili mund të shërbejë për dhënien e vendimit për aplikimin për azil;

ç) fsheh faktin që ai kishte paraqitur më parë një aplikim për azil në një vend tjetër dhe veçanërisht ka përdorur identitet të rremë;

d) bën aplikimin, me qëllim shtyrjen e urdhrin të detyruar të largimit.

Neni 43

Pezullimi dhe pushimi i procedurës së shqyrtimit të aplikimit për azil

1. Procedura për dhënien e azilit pezullohet kur azilkërkuesi:

a) tërheq aplikimin për azil;

b) nuk paraqitet në dëgjimin e çështjes, pa arsye të justifikuar;

c) nuk informon në kohë autoritetin përgjegjës për azilin dhe refugjatët në lidhje me ndryshimin e adresës së tij, pa një arsye të justifikuar, ose, në disa mënyra të tjera, pengon njoftimin;

ç) nuk merr pjesë në verifikimin e identitetit të tij;

d) shmang dhënien e informacionit në lidhje me faktet dhe rrethanat ose për provat përkatëse në posedim të tij për përcaktimin e ligjshmërisë së aplikimit;

dh) largohet nga Republika e Shqipërisë gjatë procedurës së shqyrtimit të aplikimit për azil.

2. Autoriteti përgjegjës për azilin dhe refugjatët, pas pezullimit, sipas shkronjave “a” dhe “dh”, të pikës 1, të këtij neni, merr vendim për pushimin e shqyrtimit të aplikimit për azil.

3. Procedura dhe afati për marrjen e vendimit për pushimin e shqyrtimit të aplikimit për azil përcaktohen me udhëzim të ministrit përgjegjës.

Neni 44

Pjesëmarrja e personave të tjerë në procedurën e shqyrtimit të aplikimit për azil

1. Procedura për dhënien e azilit është e mbyllur për publikun.

2. Personat, të cilët marrin pjesë në procedurën e shqyrtimit të aplikimit për azil, janë:

a) përfaqësuesi ligjor ose kujdestari i të miturit të pashoqëruar;

b) kujdestari i një të rrituri me aftësi të kufizuara.

3. Përrjashtimisht nga pika 1, e këtij neni, nëse azilkërkuesi nuk kundërshton, një përfaqësues i

UNHCR-së ose i organizatave të tjera që kanë të bëjnë me mbrojtjen e të drejtave të refugjatëve mund të marrë pjesë gjatë procedurës për shqyrtimin e aplikimit për azil.

Neni 45

Revokimi, mbarimi dhe ose refuzimi për të ripërtërirë statusin e refugjatit

Autoriteti përgjegjës për azilin dhe refugjatët mund të revokojë, të mbarojë apo të refuzojë për të ripërtërirë statusin e refugjatit nëse:

a) refugjati pohon vullnetarisht në çfardollos formë se gëzon mbrojtjen e vendit të origjinës ose të ndonjë vendi tjetër të vendqëndrimit të tij të mëparshëm;

b) i huaji fiton shtetësinë dhe gëzon mbrojtjen e vendit të shtetësisë së fituar;

c) nuk ekzistojnë rrethanat, për të cilat i është dhënë statusi i refugjatit;

ç) provohet se i huaji, që ka përfituar azil, ka paraqitur fakte dhe rrethana të pavërteta për marrjen e statusit të refugjatit, të cilat kanë qenë vendimtare në marrjen e statusit;

d) kur i huaji ka edhe shtetësi tjetër;

dh) kur vërtetohet një nga rrethanat e nenit 5 të këtij ligji;

e) ai vepron në kundërshtim me përcaktimin e nenit 18 të këtij ligji;

ë) ka dalë nga territori i Republikës së Shqipërisë duke lëshuar një deklaratë të shkruar ose kur largohet nga Republika e Shqipërisë për më shumë se 90 ditë, pa njoftuar autoritetin përgjegjës për azilin dhe refugjatët;

f) atij i është njoftuar masa e largimit ose dëbimit.

Neni 46

Largimi nga territori

1. Azilkërkuesit, të cilin i është refuzuar ose nuk i është pranuar aplikimi për azil apo i është revokuar vendimi i statusit të refugjatit, është subjekt i largimit nga territori, sipas përcaktimeve në ligjin për të huajt.

2. Familjarët, të cilët kanë përfituar bashkim familjar me të huajin, sipas përcaktimeve të bëra në pikën 1, të këtij neni, janë gjithashtu në të njëjtën kohë subjekt largimi.



Neni 47

E drejta e ankimit

1. Të gjitha vendimet për dhënien, revokimin, mbarimin e heqjen e statusit të refugjatit, statusit të mbrojtjes plotësuese, si dhe çdo akt tjetër vendimmarrës i autoritetit përgjegjës për azilin dhe refugjatët mund të ankimohen pranë Komisionit Kombëtar për Azilin dhe Refugjatët, brenda afateve dhe sipas procedurave të parashikuara nga Kodi i Procedurave Administrative.

2. Vendimi i Komisionit Kombëtar për Azilin dhe Refugjatët mund të ankimohet në gjykatën kompetente për çështjet administrative, në përputhje me legjislacionin në fuqi.

KREU VI**TË DREJTAT E REFUGJATËVE**

Neni 48

Të drejtat e refugjatëve

1. Refugjati në Republikën e Shqipërisë gëzon status ligjor, në përputhje me Kushtetutën dhe legjislacionin shqiptar, me seksionin e Aktit Final të Konferencës së të Plotfuqishmëve, me konventën e OKB-së së vitit 1951, “Për statusin e refugjatëve” dhe me marrëveshjet e tjera ndërkombëtare ku Shqipëria është palë, si dhe të gjitha të drejtat që legjislacioni shqiptar u njeh të huajve.

2. Refugjati pajiset me leje qëndrimi të përhershme dhe me leje pune të posaçme.

3. Refugjati pajiset me letërnjoftim elektronik dhe dokument udhëtimi. Ky dokument, për aq kohë sa është i vlefshëm, mund të përdoret për të udhëtuar në të gjitha shtetet, me përjashtim të shtetit të origjinës, dhe për t'u rikthyer në Republikën e Shqipërisë, përveç rasteve kur arsye të forta të sigurisë kombëtare dhe rendit publik kërkojnë ndryshe.

Neni 49

E drejta për arsimim

1. Refugjati në Republikën e Shqipërisë gëzon të drejtën e arsimimit në institucionet publike njëjloj si shtetasi shqiptar.

2. Institucionet arsimore publike para-universitare janë të detyruara të regjistrojnë refugjatën, me paraqitjen nga vetë kërkuuesi të dokumenteve përkatëse, përveç rasteve kur parashikohet ndryshe.

3. Ministri përgjegjës për çështjet e arsimit përcakton kriteret e vlerësimit të nivelit të arsimimit të refugjatit. Vlerësimi bëhet nga njësia arsimore vendore, që mbulon institucionin në të cilin kërkon të regjistrohet refugjati.

4. Refugjati ka të drejtë të konkurrojë për arsimin e lartë, sipas kriterëve të përcaktuara në fuqi për arsimin e lartë.

5. Autoriteti përgjegjës për azilin dhe refugjatët mund të mbulojë shpenzimet, që rrjedhin nga legjislacioni për arsimin e lartë, për ciklin e parë të studimeve të larta për refugjatën. Mbulimi i shpenzimeve përfshin vetëm periudhën kohore, të parashikuar për marrjen e diplomës përkatëse.

6. Shuma e shpenzimeve dhe kriteret për dhënien e kësaj mbështetjeje përcaktohen me urdhër të ministrit përgjegjës, sipas legjislacionit në fuqi.

Neni 50

Mësimi i gjuhës shqipe

1. Autoriteti përgjegjës për azilin dhe refugjatët, në bashkëpunim me institucionet përkatëse arsimore, organizon kurse të gjuhës shqipe, të edukimit qytetar dhe kurse kualifikimi për refugjatët.

2. Kriteret dhe procedura e bashkëpunimit përcaktohen me udhëzim të përbashkët të ministrit përgjegjës dhe ministrit përgjegjës për çështjet e arsimit.

Neni 51

E drejta për punë

Refugjati ka të drejtën për t'u pajisur me leje pune për raste të veçanta që nga momenti i marrjes së statusit, si dhe gëzon të njëjtat mundësi ligjore në tregun e punës sikurse shtetasi shqiptar.

Neni 52

Pajisja me leje pune

1. Autoriteti përgjegjës për çështjet e migracionit në ministrinë që mbulon çështjet e punës pajis me leje pune refugjatën, me kërkesën e këtij të fundit, të dërguar nëpërmjet autoritetit përgjegjës për azilin dhe refugjatët.

2. Kriteret, procedurat dhe dokumentacioni për pajisjen, ripërtëritjen apo anulimin e lejes së punës së refugjatit përcaktohen me vendim të Këshillit të Ministrave.



Neni 53

Karakteristikat e lejes së punës dhe regjistrimi në zyrën e punësimit

1. Leja e posaçme e punës ka, përveç të tjerave, këto karakteristika:

a) jepet për një periudhë 1-vjeçare dhe ripërtërihet në përfundim të këtij afati, me kërkesën e personit të interesuar;

b) është e vlefshme në të gjithë territorin e Republikës së Shqipërisë;

c) kërkohet dhe është e vlefshme edhe në rastin e vetëpunësimit.

2. Leja e punës për refugjatin jepet pa pagesë.

3. Refugjati regjistrohet në zyrën përkatëse të punësimit, në territorin e së cilës punëdhënësi, pranë të cilit do të punësohet, ushtron veprimtarinë ekonomike.

Neni 54

E drejta për trajtim social

1. Refugjati gëzon të drejtën e trajtimit social njëjloj si shtetasi shqiptar, në përputhje me legjislacionin përkatës nga institucionet përkatëse.

2. Në kuptim të këtij ligji, me trajtim social kuptohen:

a) sigurimet shoqërore;

b) ndihma ekonomike;

c) sigurimet shëndetësore.

Neni 55

Sigurimet shoqërore dhe shëndetësore

Refugjati i punësuar dhe i siguruar gëzon të drejtën për të përfutuar nga sigurimet shoqërore dhe shëndetësore të detyrueshme, në përputhje me legjislacionin në fuqi për sigurimet shoqërore dhe shëndetësore në Republikën e Shqipërisë.

Neni 56

Ndihma ekonomike

1. Refugjati, pas marrjes të statusit, përfiton ndihmë ekonomike sipas legjislacionit për ndihmën dhe shërbimet shoqërore.

2. Kjo ndihmë jepet edhe për familjen e refugjatit, të cilit i mungojnë krejtësisht të ardhurat dhe mjetet e jetesës ose i ka ato të pamjaftueshme.

3. Refugjati, për sa kohë trajtohet në qendrën e pritjes për azilkërkuesit ose në ato të strehimit të përkohshëm, nuk përfiton ndihmë ekonomike.

Ministri i Brendshëm dhe ministri që mbulon çështjet sociale me udhëzim të përbashkët parashikojnë rastet e përfitimit të ndihmës ekonomike, sipas nivelit të ardhurave dhe mjeteve të jetesës. Përjashtim bëhet vetëm në raste të veçanta, të përcaktuara me udhëzimin e përbashkët të ministrit përgjegjës dhe ministrit që mbulon çështjet sociale, kur niveli i të ardhurave dhe mjetet e jetesës janë tepër minimale.

Neni 57

Shpërndarja e ndihmës ekonomike

1. Autoriteti përgjegjës për azilin dhe refugjatët përcjell dokumentacionin e nevojshëm pranë autoriteteve kompetente për shpërndarjen e ndihmës ekonomike.

2. Ndihma ekonomike për refugjatët jepet nga njësia e qeverisjes vendore ku ka vendqëndrimin refugjati, në bazë të legjislacionit për ndihmën dhe shërbimet shoqërore.

3. Ndihma ekonomike, kriteret dhe procedura për dhënien e ndihmës ekonomike miratohen nga Komisioni Qendror pranë Shërbimit Social Shtetëror, me propozimin e autoritetit përgjegjës për azilin dhe refugjatët.

Neni 58

Përfitimi i ndihmës dhe kujdesit shoqëror

1. Refugjati gëzon të drejtën e ndihmës dhe kujdesit shoqëror, njëjloj si shtetasi shqiptar. Dokumentacioni përkatës përgatitet për këtë qëllim nga autoriteti përgjegjës për azilin dhe refugjatët.

2. Kriteret, procedura për përfitimin e ndihmës dhe kujdesit shoqëror dhe lista e dokumentacionit përkatës përcaktohen me udhëzim të ministrit përgjegjës dhe të ministrit përgjegjës për çështjet e punës dhe sociale.

Neni 59

Vendosja në institucionet e përkujdesjes shoqërore

1. Refugjati, që përmbush kriteret e legjislacionit në fushën e përkujdesjes shoqërore, mund të vendoset në institucionet publike të përkujdesjes. Dokumentacioni i pranimin në këto institucione miratohet nga Komisioni Qendror pranë Shërbimit Social Shtetëror, me propozimin e autoritetit përgjegjës për azilin dhe refugjatët, në bazë të të dhënave të mbajtura në regjistrat e posaçëm.



2. Ministri përgjegjës mund të lidhë kontrata me institucione jopublike të përkujdesjes shoqërore për trajtimin e refugjatëve, në përputhje me legjislacionin në fuqi.

Neni 60

E drejta për strehim

Refugjati në Republikën e Shqipërisë ka të drejtë të gëzojë mundësitë ligjore për përfitimin e strehimit, si shtetasi shqiptar.

Neni 61

Strehimi i refugjatit në qendrën e pritjes për azilkërkuesit

Përbashimisht, refugjati, në mungesë të mundësive të veta për strehim, ka të drejtë të qëndrojë në qendrën e pritjes për azilkërkuesit ose në ato të strehimit të përkohshëm.

Neni 62

Ndihma për strehim nëpërmjet pagesës së pjesshme të qirasë

1. Autoriteti përgjegjës për azilin dhe refugjatët mund të mbulojë deri në 50 për qind të shumës së qirasë për strehimin për një periudhë 6-mujore, kur refugjati është në pamundësi për t'u strehuar me mjete të vetat.

2. Me kërkesë të refugjatit, periudha e përfitimit mund të shtyhet edhe për gjashtë muaj të tjerë, kur vazhdojnë kushtet e parashikuara më lart.

3. Kriteret për dhënien e kësaj ndihme, masa e përfitimit dhe kërkesat e tjera procedurale përcaktohen me vendim të Këshillit të Ministrave.

KREU VII

BASHKIMI FAMILJAR I REFUGJATIT

Neni 63

Paraqitja dhe shqyrtimi i kërkesës për bashkim familjar

1. Kërkesa për bashkim familjar paraqitet pranë autoritetit përgjegjës për azilin dhe refugjatët nga ana e refugjatit dhe personave në mbrojtje.

2. Refugjati paraqet aplikimin për bashkim familjar pranë autoritetit përgjegjës për azilin dhe refugjatët, duke plotësuar formularin e veçantë të aplikimit. Nëse është e nevojshme, i garantohet përkthyes për plotësimin e aplikimit.

3. Në rastin e paraqitjes së aplikimit për bashkim familjar, aplikuesi duhet të plotësojë kushtet e mëposhtme:

a) të sigurojë strehim në kushte normale jetese, sipas standardeve për shëndetin dhe sigurinë;

b) të garantojë sigurimin shëndetësor për vete dhe familjen e tij;

c) të garantojë burime të qëndrueshme të ardhurash financiare për të siguruar veten dhe familjen e tij, pa iu drejtuar skemës së sigurimeve shoqërore apo pa qenë në ngarkim të Buxhetit të Shtetit.

4. Formulari i aplikimit duhet të shoqërohet me një kopje të noterizuar të dokumenteve të udhëtimit të anëtarëve të familjes dhe me prova të dokumentuara të lidhjes familjare të aplikuesit me personin ose personat me të cilin/të cilët kërkohet bashkimi familjar. Në formular përfshihen të dhënat biografike të personit me të cilin kërkohet bashkimi familjar dhe të dhëna për lidhjen familjare me aplikuesin. Nëse është e mundur, në mënyrë që të marrë dëshmi se ekziston një marrëdhënie familjare, organi përgjegjës mund të zhvillojë intervista apo hetime të tjera që janë të nevojshme.

5. Nëse refugjati nuk mund të paraqesë prova të dokumentuara zyrtarisht të marrëdhënies familjare, autoriteti përgjegjës për azilin dhe refugjatët merr në konsideratë prova të tjera apo indicie, të cilat vlerësohen në pajtim me legjislacionin e brendshëm, lidhur me ekzistencën e kësaj marrëdhënieje. Vendimi për refuzimin e kërkesës nuk mund të bazohet vetëm në faktin e mungesës së provave të dokumentuara.

6. Shqyrtimi i aplikimit për bashkim familjar fillon brenda 10 ditëve nga data e depozitimit të aplikimit.

7. Autoriteti përgjegjës për azilin dhe refugjatët, në përfundim të procedurës, shprehet me vendim të arsyetuar.

8. Formulari i aplikimit dhe formati tip i vendimit miratohen me urdhër të ministrit përgjegjës.

9. Vendimi për aplikimin për bashkim familjar nga autoriteti përgjegjës për azilin dhe refugjatët merret brenda 30 ditëve nga data e paraqitjes së aplikimit.

10. Në rastin kur aplikimi për bashkimin familjar ka lidhje me një të mitur të pashoqëruar, vendimi merret brenda 20 ditëve nga dita e paraqitjes së aplikimit.



11. Autoriteti përgjegjës për azilin dhe refugjatët njofton me shkrim aplikuesin për vendimin, brenda 5 ditëve nga data e marrjes së tij.

12. Gjatë shqyrtimit të aplikimit, organi vendimmarrës duhet të ketë në konsideratë interesin më të lartë të fëmijës në përputhje me nenin 17 të këtij ligji.

Neni 64

E drejta e bashkimit familjar të refugjatit dhe procedura e aplikimit

1. Anëtarët e familjes së refugjatit dhe ata nën mbrojtje plotësuese në Republikën e Shqipërisë gëzojnë të drejtën e bashkimit familjar. Këtë të drejtë mund ta gëzojnë përjashtimisht edhe personat që janë nën mbrojtje të përkohshme.

2. Refugjati i mitur dhe i pashoqëruar ka të drejtë të kërkojë bashkim familjar me prindërit, motrat, vëllezërit, anëtarë të tjerë të familjes, të cilët bashkëjetojnë me të ligjërisht ose që janë të mitur dhe të pamartuar. Kur këta persona të familjes, të shkallës së parë, në linjë të drejtë, nuk mund të gjenden, i mituri i pashoqëruar ka të drejtë të kërkojë bashkim familjar me kujdestarin ligjor ose me ndonjë të afërm tjetër, jo në linjë të drejtë.

3. Në rast të një martesë poligame, kur një nga bashkëshortët e refugjatit jeton me të në Republikën e Shqipërisë, nuk mund të autorizohet hyrja, qëndrimi dhe dhënia e bashkimit familjar të bashkëshortit ose bashkëshortes tjetër dhe as të fëmijëve të këtij bashkëshorti ose bashkëshorteje, pa parasykuar dispozitat e konventës “Mbi të drejtat e fëmijës” të vitit 1989.

4. Në rast të një martesë poligame, kur bashkëshortët jetojnë jashtë territorit të Republikës së Shqipërisë, aplikuesi ka të drejtë të kërkojë bashkim familjar me njërin nga bashkëshortët dhe me fëmijët e këtij bashkëshorti ose bashkëshorteje, sipas përcaktimeve të pikës 1 të këtij neni.

5. Refugjati ka të drejtë të aplikojë për bashkim familjar, vetëm pas dhënies së vendimit përfundimtar.

6. Gjatë shqyrtimit të aplikimit lidhur me bashkimin familjar të partnerit/partneres, bashkëjetues/e të aplikuesit, do të merren si provë e marrëdhënies familjare faktorë, si fëmijë i përbashkët, banim i përbashkët, regjistrim i partneritetit dhe çdo mjet tjetër provë i besueshëm.

7. Autoriteti përgjegjës për azilin dhe refugjatët mund të kryejë intervista me aplikuesin dhe anëtarët e tij të familjes, si dhe regjistron të gjitha të dhënat e përfituara gjatë shqyrtimit të aplikimit.

8. Gjatë procedurës së aplikimit për bashkim familjar aplikuesi mund të ndihmohet, të këshillohet ose të përfaqësohet nga një avokat.

Neni 65

Sanksionet dhe e drejta e ankimit

1. Autoriteti përgjegjës për azilin dhe refugjatët mund të refuzojë aplikimin për bashkim familjar, të revokojë ose të refuzojë rinovimin e lejes së qëndrimit të familjes nëse vërtetohet një nga rastet:

a) për arsye të cenimit të sigurisë publike, sigurisë kombëtare dhe shëndetit publik;

b) kur nuk përmbushen kushtet e përcaktuara nga ky ligj;

c) kur aplikuesi për bashkim familjar ose anëtarët e familjes së tij në vendin pritës, gjatë qëndrimit në vendin e origjinës, nuk kanë jetuar në marrëdhënie martesore ose familjare;

ç) kur vërtetohet se janë paraqitur të dhëna të pavërteta, dokumente të falsifikuara apo janë përdorur mashtrime;

d) kur provohet se martesë ose birësimi janë bërë me qëllimin e vetëm për t'i mundësuar personit të interesuar hyrjen dhe qëndrimin në Republikën e Shqipërisë.

2. Vendimi i refuzimit të aplikimit, revokimit për bashkim familjar apo refuzimit për të rinovuar lejen e qëndrimit të familjes duhet të jetë i arsyetuar.

3. Autoriteti përgjegjës për azilin mund të realizojë inspektime për vërtetimin e rasteve të parashikuara në shkronjat “a”, “b”, “c” dhe “ç”, të pikës 1, të këtij neni.

4. Kundër vendimit të refuzimit të aplikimit, revokimit apo mosrinovimit të lejes mund të bëhet ankim pranë Komisionit Kombëtar për Azilin dhe Refugjatët, brenda 5 ditëve nga data e njoftimit me shkrim të vendimit.

5. Kundër vendimit të Komisionit Kombëtar për Azilin dhe Refugjatët mund të bëhet ankim në gjykatën kompetente për zgjidhjen e mosmarrëveshjeve administrative, sipas legjisllacionit në fuqi.



Neni 66

Të drejtat e anëtarëve të familjes së refugjatit për bashkim familjar

Anëtarët e familjes së refugjatit, që kanë përfituar nga vendimi për bashkim familjar, kanë të njëjtat të drejta sikurse dhe aplikuesi për:

- a) arsimim në institucionet arsimore publike;
- b) punësim dhe vetëpunësim;
- c) këshillim profesional dhe trajnim.

Neni 67

Hyrja dhe qëndrimi i anëtarëve të familjes

1. Autoriteti përgjegjës për azilin dhe refugjatët njofton me shkrim ministrinë përgjegjëse për çështjet e punëve të jashtme për vendimin për pranimin e kërkesës për bashkim familjar.

2. Personat, që përfitojnë nga vendimi për bashkimin familjar, pajisen me vizë hyrjeje në kufi, në rast se kërkohet një e tillë. Ata pajisen me leje qëndrimi, sipas rregullave dhe procedurave që zbatohen për dhënien e lejeve të qëndrimit për refugjatit.

KREU VIII

MBROJTJA E PËRKOHSHME

Neni 68

Mbrojtja e përkohshme

1. Mbrojtja e përkohshme u jepet të huajve, të cilët masivisht hyjnë në Republikën e Shqipërisë nga vendi në të cilin, për shkak të një lufte apo të një situate të përgjithshme të dhunës, të shkeljes të të drejtave të njeriut, kur shteti, nga i cili kanë ardhur, nuk mund të garantojë mbrojtjen e tyre.

2. Mbrojtja e përkohshme jepet kur:

a) personi ka vendqëndrimin e tij të përkohshëm/të përhershëm në shtetin nga i cili vjen dhe, për shkaqet e përcaktuara në pikën 1 të këtij neni, ka ardhur në Republikën e Shqipërisë;

b) personi, i cili qëndron në Republikën e Shqipërisë edhe pse i ka përfunduar afati i qëndrimit, nuk mund të kthehet në shtetin ku ka pasur vendqëndrimin apo vendbanimin për shkaqet e përcaktuara në pikën 1, të këtij neni.

3. I huaji, i cili gëzon mbrojtje të përkohshme, mund të paraqesë në çdo kohë aplikim për azil.

4. Nëse është paraqitur aplikim për azil gjatë periudhës së mbrojtjes së përkohshme, shqyrtimi i këtij aplikimi duhet të fillojë vetëm pas përfundimit të afatit të mbrojtjes së përkohshme.

Neni 69

Kompetenca për dhënien dhe afati i mbrojtjes së përkohshme

1. Autoriteti përgjegjës për azilin dhe refugjatët jep mbrojtje të përkohshme për një periudhë 1-vjeçare.

2. Mbrojtja e përkohshme, nëse ekzistojnë arsye, mund të zgjatet automatikisht për një periudhë prej 6 muajsh, por jo më shumë se 3 vjet.

3. Për procedurën e shqyrtimit të kërkesës për mbrojtjen e përkohshme zbatohet, për aq sa është e mundur, procedura për shqyrtimin e aplikimit për azil, përveçse kur rrethanat e fluksit masiv diktojnë ndryshe.

Neni 70

Refuzimi i mbrojtjes së përkohshme

Mbrojtja e përkohshme nuk i jepet të huajit nëse:

a) nuk ekzistojnë rastet e situatave të parashikuara në nenin 68 të këtij ligji;

b) ekzistojnë shkaqet e parashikuara në nenet 5 dhe 19 të këtij ligji;

c) ka kryer një krim në Republikën e Shqipërisë, për të cilin parashikohet një dënim me burg mbi 5 vjet, i cili nuk është parashkuar;

ç) ka statusin e refugjatit ose të mbrojtjes plotësuese;

d) ka shtetësinë shqiptare ose leje qëndrimi, sipas ligjit për të huajt.

Neni 71

Përfundimi i mbrojtjes së përkohshme

1. Mbrojtja e përkohshme përfundon:

a) me mbarimin e afatit të caktuar;

b) kur arsyet për mbrojtje të përkohshme nuk ekzistojnë më;

c) kur i huaji largohet nga Republika e Shqipërisë;

ç) nëse të huajit i është dhënë një lloj tjetër mbrojtjeje, sipas një ligji të caktuar ose një marrëveshjeje ndërkombëtare;

d) nëse i huaji gëzon mbrojtje ndërkombëtare ose qëndron në mënyrë të rregullt në Republikën e Shqipërisë;

dh) nëse i huaji i nënshtrohet masës së dëbimit.

2. Në rast të përfundimit të mbrojtjes së përkohshme, sipas pikës 1, të këtij neni, me përjashtim të shkronjës “c”, të huajit në mbrojtje të përkohshme i njihet e drejta e kthimit vullnetar, në përputhje me legjislacionin në fuqi.



3. Shkronja “dh”, e pikës 1, të këtij neni, nuk zbatohet për personat të cilët, për shkak të gjendjes shëndetësore të rënduar ose për arsye humanitare, nuk mund t'i nënshtrohen masës së dëbimit, për sa kohë zgjat kjo situatë.

4. Gjatë ekzekutimit të masës së dëbimit, autoritetet përgjegjëse duhet të respektojnë të drejtat, liritë dhe dinjitetin e të huajit, të cilit i ka përfunduar mbrojtja e përkohshme.

Neni 72

Të drejtat dhe detyrimet e të huajve nën mbrojtje të përkohshme

1. I huaji, të cilit i është dhënë mbrojtje e përkohshme, ka të drejtën:

- a) e banimit;
- b) që t'i garantohen kushtet themelore të jetesës e të strehimit;
- c) e kujdesit shëndetësor;
- ç) e arsimimit fillor dhe të mesëm;
- d) e këshillimit ligjor;
- dh) e lirisë së fesë;
- e) për punë.

2. Detyrimet e përcaktuara në nenin 18, të këtij ligji, zbatohen edhe për të huajt, të cilëve u është dhënë mbrojtje e përkohshme.

Neni 73

E drejta për bashkim familjar

1. Përjashtimisht, përveç të drejtave të parashikuara në nenin 72, të këtij ligji, një i huaj nën mbrojtje të përkohshme gëzon të drejtën për të kërkuar bashkim familjar, nëse kjo e drejtë nuk mund të realizohet në asnjë vend tjetër, përveçse vetëm në territorin e Republikës së Shqipërisë. Për paraqitjen e aplikimit zbatohet, për aq sa është e mundur, neni 64 i këtij ligji.

2. E drejta për bashkim familjar i njihet edhe të miturit që nuk e ka krijuar akoma familjen e tij dhe bashkëshortit të të huajit, të cilit i është dhënë mbrojtje e përkohshme.

3. Mbrojtja e përkohshme zgjatet edhe për anëtarët e tjerë të familjes.

Neni 74

Strehimi i të huajve nën mbrojtje të përkohshme

Të huajit, të cilit i është dhënë mbrojtje e përkohshme, i sigurohet strehim, në përputhje me legjislacionin në fuqi.

Faqe | 8130

Neni 75

Leja e qëndrimit dhe vërtetimi për të huajin nën mbrojtje të përkohshme

Të huajit nën mbrojtje të përkohshme i lëshohet vërtetim dhe leje qëndrimi e përkohshme, sipas kushteve dhe kritereve të përcaktuara për azilkërkuesit, për aq sa përshtaten.

Neni 76

Dispozitë referuese

Dispozitat referuar refugjatëve do të zbatohen për aq sa përshtaten edhe ndaj të huajve nën mbrojtje të përkohshme.

Neni 77

Kufizimi i të drejtave

I huaji, që aplikon për azil përgjatë mbrojtjes së përkohshme, nuk mund të përdorë të drejtat e azilkërkuesit, për aq kohë sa zgjat mbrojtja e përkohshme.

KREU IX

MBROJTJA PLOTËSUESE

Neni 78

Cenimi serioz

Me cenim serioz, për qëllim të dhënies së statusit të mbrojtjes plotësuese, kuptohet:

- a) dënimi me vdekje apo ekzekutimi; ose
- b) tortura apo trajtimi ose dënimi johuman apo degradues, si dhe zhdukja me forcë e aplikuesit në vendin e origjinës; apo
- c) kërcënimi serioz dhe individual ndaj jetës së një personi, për shkak të dhunës, pa dallim në situatat e konfliktit të armatosur ndërkombëtar apo të brendshëm.

Neni 79

Pushimi i statusit të mbrojtjes plotësuese

1. I huaji apo personi pa shtetësi nuk gëzon më statusin e mbrojtjes plotësuese kur rrethanat, për të cilat është dhënë ky status, nuk ekzistojnë më ose kanë ndryshuar në një masë të tillë sa që mbrojtja nuk është më e nevojshme.

2. Pika 1 nuk zbatohet ndaj personit me statusin e mbrojtjes plotësuese, i cili dëshmon se nuk mund të gëzojë mbrojtjen nga shteti i tij apo shteti në të cilin ka vendbanimin e zakonshëm për personat pa shtetësi, pasi ekzistojnë akoma arsye të imponuara nga cenimi i mëparshëm.



Neni 80

Përfashtimi

I huaji apo personi pa shtetësi përjashtohet nga dhënia e statusit të mbrojtjes plotësuese kur ekziston një nga rrethanat e mëposhtme:

a) ka kryer krim kundër paqes, krim lufte apo krim kundër njerëzimit, të përcaktuara sipas instrumenteve të së drejtës ndërkombëtare;

b) ka kryer një krim të rëndë;

c) është fajtor për vepra që janë në kundërshtim me qëllimet dhe parimet e Kombeve të Bashkuara, sipas përcaktimit të neneve 1 dhe 2 të Kartës së Kombeve të Bashkuara;

ç) cenon rendin dhe sigurinë publike të Republikës së Shqipërisë.

Neni 81

Dhënia e statusit të mbrojtjes plotësuese

1. Statusi i mbrojtjes plotësuese i jepet të huajit ose personit pa shtetësi, kur ekzistojnë rrethanat e përcaktuara në nenin 78 të këtij ligji.

2. Procedura, afatet për dhënien e statusit të mbrojtjes plotësuese dhe e drejta e ankimit realizohen sipas parashikimeve të bëra në këtë ligj për dhënien e statusit të refugjatit, për aq sa mund të zbatohen.

Neni 82

Revokimi, përfundimi apo refuzimi për të ripërtërirë statusin e mbrojtjes plotësuese

1. Statusi i mbrojtjes plotësuese revokohet, përfundon apo nuk i ripërtërihet të huajit apo personit pa shtetësi, kur:

a) paraqiten rrethanat e nenit 80 të këtij ligji;

b) paraqitja e fakteve të pavërteta ose fshehja e tyre, si dhe përdorimi i dokumenteve të falsifikuara kanë qenë vendimtare për dhënien e statusit të mbrojtjes plotësuese.

2. Autoriteti përgjegjës për azilin dhe refugjatët shqyrton individualisht faktet dhe rrethanat e përcaktuara në pikën 1 të këtij neni.

Neni 83

Të drejtat dhe detyrimet e të huajve nën mbrojtje plotësuese

1. I huaji, të cilit i është dhënë statusi i mbrojtjes plotësuese, ka të drejtë:

a) t'i garantohen kushtet themelore të jetesës, të banimit e të strehimit;

b) e kujdesit shëndetësor dhe social;

c) e arsimimit fillor dhe të mesëm;

ç) e këshillimit ligjor;

d) e lirisë së fesë;

dh) e bashkimit familjar;

e) e pajisjes me leje qëndrimi;

ë) e punësimit.

2. Detyrimet e përcaktuara në nenin 18, të këtij ligji, zbatohen edhe për të huajt të cilëve u është dhënë statusi i mbrojtjes plotësuese.

Neni 84

Dokumenti i udhëtimit dhe letërnjoftimi elektronik për të huajt në mbrojtje plotësuese

1. Të huajit në mbrojtje plotësuese, me kërkesën e tij, i lëshohet letërnjoftim elektronik dhe dokument udhëtimi, që i mundëson atij të udhëtojë jashtë territorit të Republikës së Shqipërisë, me përjashtim të rasteve kur cenohet siguria kombëtare apo rendi publik.

2. Kriteret dhe procedura për pajisjen me letërnjoftim elektronik dhe dokument udhëtimi për këtë kategori personash përcaktohen me udhëzim të ministrit përgjegjës.

3. Format i dokumenteve të sipërpërmendura përcaktohet me vendim të Këshillit të Ministrave.

KREU X

DISPOZITA KALIMTARE DHE TË FUNDIT

Neni 85

Dispozita kalimtare

Lejet e punës së refugjatëve dhe përjashtimet nga detyrimi për pajisje me leje pune, në zbatim të dispozitave të legjislacionit në fuqi, para datës së hyrjes në fuqi të këtij ligji, janë të vlefshme deri në përfundim të datës së përfundimit të tyre sa kohë që nuk anulohen nga autoritetet shtetërore përgjegjëse ose nuk bëhen të pavlefshme, në zbatim të dispozitave të këtij ligji.

Neni 86

Aktet nënligjore

1. Ngarkohet Këshilli i Ministrave që, brenda 6 muajve nga hyrja në fuqi e këtij ligji, të nxjerrë aktet nënligjore në zbatim të neneve 10, pika 2, 22, pika 2, 32, pika 2, 52, pika 2, 62, pika 3, dhe 84, pika 3.

2. Ngarkohet ministri përgjegjës për azilin dhe refugjatët që, brenda 6 muajve nga hyrja në fuqi e



këtij ligji, të nxjerrë aktet nënligjore në zbatim të neneve 8, pikat 2 dhe 3, 20, pika 3, 26, pika 3, 27, pika 5, 29, pikat 1 dhe 2, 38, pika 5, 43, pika 3, 63, pika 7, dhe 84, pika 2.

3. Ngarkohet ministri përgjegjës për çështjet e arsimit që, brenda 6 muajve nga hyrja në fuqi e këtij ligji, të nxjerrë aktet nënligjore në zbatim të nenit 49, pikat 3 dhe 6, dhe nenit 50, pika 2.

4. Ngarkohet ministri përgjegjës për çështjet e punës dhe mirëqenies sociale dhe ministri përgjegjës për azilin dhe refugjatët që, brenda 6 muajve nga hyrja në fuqi e këtij ligji, të nxjerrë aktet nënligjore në zbatim të nenit 56, pika 3, dhe nenit 58, pika 2.

Neni 87

Shfuqizime

Ligji nr. 8432, datë 14.12.1998, “Për azilin në Republikën e Shqipërisë”, i ndryshuar, dhe ligji nr. 9098, datë 3.7.2003, “Për integrimin dhe bashkimin familjar të personave që kanë përfutur azil në Republikën e Shqipërisë”, si edhe çdo dispozitë tjetër, që bie në kundërshtim me këtë ligj, shfuqizohen.

Neni 88

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

Miruar në datën 18.9.2014

Shpallur me dekretin nr. 8736, datë 8.10.2014 të Presidentit të Republikës së Shqipërisë, Bujar Nishani

VENDIM Nr. 74/2014

PËR ZGJEDHJEN E NJË ANËTARI TË AUTORITETIT TË MEDIAVE AUDIOVIZIVE

Në mbështetje të nenit 78 të Kushtetutës, nenit 111 të Rregullores së Kuvendit dhe nenit 9, pika 4, të ligjit nr. 97/2013 “Për mediat audiovizive në Republikën e Shqipërisë”, me propozimin e Komisionit për Edukimin dhe Mjetet e Informimit Publik,

KUVENDI
I REPUBLIKËS SË SHQIPËRISË

VENDOSI:

I. Zoti Gledis Gjipali zgjidhet anëtar i Autoritetit të Mediave Audiovizive.

II. Ky vendim hyn në fuqi menjëherë.

KRYETARI
I Ilir Meta

Miruar në datën 9.10.2014

VENDIM Nr. 75/2014

PËR ZGJEDHJEN E NJË ANËTARI TË AUTORITETIT TË MEDIAVE AUDIOVIZIVE

Në mbështetje të nenit 78 të Kushtetutës, nenit 111 të Rregullores së Kuvendit dhe nenit 9, pika 4, të ligjit nr. 97/2013 “Për mediat audiovizive në Republikën e Shqipërisë”, me propozimin e Komisionit për Edukimin dhe Mjetet e Informimit Publik,

KUVENDI
I REPUBLIKËS SË SHQIPËRISË

VENDOSI:

I. Zoti Pirro Misha zgjidhet anëtar i Autoritetit të Mediave Audiovizive.

II. Ky vendim hyn në fuqi menjëherë.

KRYETARI
I Ilir Meta

Miruar në datën 9.10.2014

DEKRET Nr. 8731, datë 6.10.2014

PËR DHËNIE TË SHTETËSISË SHQIPTARE

Në mbështetje të nenit 92, pika “c” dhe nenit 93 të Kushtetutës, si dhe nenit 9, pika 7, e nenit 20 të ligjit nr. 8389, datë 5.8.1998 “Për shtetësinë shqiptare”, të ndryshuar, bazuar edhe në propozimin e Ministrisë të Arsimit dhe Sportit,

DEKRETOJ:

Neni 1

U jepet shtetësia shqiptare me kërkesë të tyre personave të mëposhtëm: